



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 2

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Tanü Rahul Gandhi-i
Mizoram semdangtsü

Hubert Hurkacz-i Shanghai
Masters kokogo



VOL. XXI NO. 09 (ADOK 09) DIMAPUR TENTONÜ (MONDAY) MONGPUTENI (OCTOBER) 16, 2023 ₹ 5.00

NE nung Airforce akangshir: Air Marshall

Guwahati, October 15, 2023 (Agencies): Indian Airforce-i Northeast nung air defence tajungba akümtsü atema mapa inyaker ta AOC-in-C Eastern Air Command Air Marshall SP Dharkar-i ashi.

“Centre-i tesüiba küm 5 tsüingda Northeast nung infrastructure kanga renlokda tsüogio ta Deobarnü Guwahati nung Air Marshall Dharkar-i osangbener dang ashi. “Sorkari Northeastern region

nung infrastructure development aika inyakogo aser maneni inyakdar. Airfields aika kümogio aser kidanger linüktem nung aliba ama Northeast nunga airfields aika kümдар” ta paisa ashi.

“Rongdak mapang nung Indian Airforce indang tayimtsü ajak linük kübok tesem ka nung belentsü koka lir. Nüingdak dang süra airforce-i Rafale squadron ana tashi Northeastern command kübok yutettsü” ta Air Marshall-isa ashi.

Kuki-Zo tsürtemi Kangpokpi nung lungkak aiter

Kangpokpi, October 15, 2023 (Agencies): Kangpokpi district nung Kuki-Zo tetsürtemi Gamgiphai nung mapang telatet makai lungkak aittsü tenzükogio.

Parnoki India sorkar dang ketdangsubaren balaka meshia lungkak aiter.

Kangpokpi district kübok tesem balala nungi Kuki-Zo tetsür noklang aika Gamgiphai nung adenshi. Iba sentong nung Committee on Tribal Unity Sadar Hills Kangpokpi lennirtemia shilem agir.

Onoki akhangba separate administration asangsang nung matalok tashi onoki lungkak aittsü ta Kuki-Zo tetsürtem atema spokesperson kati ashi.

“Onoki Indian Constitution nung lateta aliba ama separate administration meshir aser iba ya India sorkar anema inyakba mapa ka masü. Manipur sorkari onok bendanga amshiba aser

amokbanga yua aliba nungi nüjiso kua ta onoki akhangba” ta laisa ashi.

India sorkar dak tamang akaba ajanga onoki National Highways mokdangba agien aser morgue nungi tasü mangtem bener aotsü lemet. Onoki amalitep liaka India sorkari onok tebilemstü atema mapa meinyaker, ta laisa metetdaksü.

Central Bureau of Investigation (CBI) aser National Investigation Agency (NIA) ajanga shinga tsütsü tejak meshii mapa inyaker anungji bushisüingdangba maparen ya tejak repranga mesüra kar pusema meinyaktsüla, ta laisa ashi.

Kangpokpi district nung Kuki-Zo tetsürtemi aonunga mener lungkak aittsü bangjemtepogio.

“We Demand Separate Administration” aser “No Solutions, No Rest” yimyimtem ayima parnoki lungkak aiter.

Kuki nunger dang 'Israel-i meyipa oang' ta ashir



Guwahati, October 15, 2023 (Agencies): Manipur kübok Bishnupur district nung Kuki nunger dang ‘Israel-i meyipa oang’ ta züluba poster tem yuja liasü.

Israel nung Manipur aser Mizoram nungi aoba Kuki nunger nisung 200 temai Hamas anema raratsü renemba sülen Moirang jila nung poster tem yuja liasü.

Israel Defence Force (IDF) indang reserve soldiers 3, 60,000 nungi parnok 206 ji Kuki nunger lir aser parnok ya Manipur o Mizoram nungi aoertem lir ta osang angazüker. Israel nung

Kuki nunger 5000 shi lir.

Israel-i ‘lost Jewish tribe’ ta shia open-door policy kübok Kuki nunger Israel nung oa senso kümer alir.

Hamas kiralongrartemi Israel amakdang ‘lost Jewish tribes’ puri lendong tuluba ajurua liasü.

Kuki nunger teimbaka Gaza anasa Sderot yimti nung alir aser iba tesem nung lendong tuluba ataloka liasü. Kuki nunger rongnung tasüba maliasü saka kibong ka ki rongdoktsü. Parnok dang Hebrew oshi nung Bnei Menashe ta ajar.

Israel-i Hamas samatsütsü: PM Benjamin Netanyahu



October 15, 2023 nü Prime Minister Benjamin Netanyahu-i national emergency government senden nung o jembiba angur.

New Delhi, October 15, 2023 (Agencies): Israel Prime Minister Benjamin Netanyahu-i Deobarnü emergency cabinet ulushio.

“Hamas-i asenoki loksaa aotsü ta bilem saka asenoki Hamas samatsütsü. Linük ajunga parnok den lir ta Israeli Military Force-i meteta lir aser iba ya tia tamajung ka ajuruba ta parnoki angateta lir” ta Netanyahu-i ashi.

Hamas kiralongrartemi pur aoba Israel nunger kinungertem den Netanyahu-i Deobar nikongdang mezüing ajurutepa senden menogio.

Israel sorkari Gaza nung pua alirtem asoshi mebilemstür ta Hamas-i pur aoba kinungertemi ashir.

“Israel-i alima nungi samatsütsü ta tezüingzüktep agia aliba tsükchir ka den kodanga olemtep malitsü” ta National Security Council Advisor Tzachi Hanegbi-i Honibarnü shia liasü.

Advisor Tzachi-i iba olen jembiba sülen Gaza nung pua aliba Israel nunger kinungertemi sangdong ka nung sorkari pei

sensotem senzüka yutsür ta metetdaksüogio.

Israeli defense forces-i tesem ana nung raratsü tenzükogio. October 7 nü Hamas-i amakba sülen Israel-i parnok den rara tenzüka liasü saka ano Lebanon nungi Hezbollah teloki missile ka poklokttsüba sülen parnok dena rara tenzükogio.

Hezbollah telungpurtemi Israel anüdoklentip tsütsü yimtsüing ka nung missile poklokttsüdang nisung ka asü aser 3 yiru.

Iba tatalokba sülen Israel sepaitemi Lebanon nung tayimtsü ajanga Hezbollah teseptemamaksü tenzükogio aser Lebanon den arrtsülen kilometre 4 telongtet nung public malitsü tetuyuba agütsüogio.

Israel-i anüdoklentip tsütsü raratsü tejangraba mali aser Hezbollah aziüka dang lira Israel-i arrtsülen tensa meraksatsü Israel Defence Minister-i Deobarnü metetdaksü.

Gaza Strip aser West Bank nung nisung 2,383 süogio ta Palestinian Health Ministry-i Deobarnü metetdaksü.

Israel aser Hamas tsüingda rara nung nisung 10,814 yirua lir. Gaza nung nisung 2,329 aser West Bank nung 54 asü. Gaza nung nisung 9,714 aser West Bank nung nisung 1,100 yirua lir, ta parnokisa ashi.

United States President Joe Biden-i Deobarnü Israeli Prime Minister Benjamin Netanyahu aser Palestinian President Mahmoud Abbas na den jembio.

Idangji Palestinian President Abbas-i Biden dang Gaza nung humanitarian aid corridors lapoktsü nüingdakba indang khuret lemsatet.

October 7, 2023 nü Israel aser Hamas tsüingda rara tenzükba sülen Joe Biden-i tang mezüing atema Abbas den jemi.

Gaza Strip nungi Egypt-i aotsü atema humanitarian corridor ka lapokja lir saka Hamas kiralongrartemi Palestine civilian tem noktanger ta Israel Defence Forces-i Deobarnü ashi.

Hamas kiralongrartemi nübertem dang nungi osettsüset aser gari sapitem meshia ayur, ta Israel Intelligence Officer kati ashi.

Meitei Leepun tanishir anema non-bailable arrest warrant agütsür

New Delhi, October 15, 2023 (Agencies): Churachandpur nung Chief Judicial Magistrate-i Meitei Leepun telok tanishir Pramot Singh anema non-bailable arrest warrant ka agütsüogio.

Arambai Tengol amala Meitei Leepun group ajanga Manipur nung tensa raksatsür ta Kuki teloktemi tai tonglokttsür saka Meitei Leepun-i ibaji magizüker.

Okadakisa Churachandpur Superintendent of Police dang November 9, 2023 tashi nung iba tetuyuba inyaktsü metetdaksüogio.

Iba ken o angadandang assistant public prosecutor-i Pramot Singh indang address ji Nepali Basti Chingmeirong,

Imphal West District, Manipur ta bushitetba osang metetdaksü. Iba ya Lamphel Police Station, Imphal West telongtet kübok lir.

Pramot Singh indang address ya Lamphel Police Station, Imphal West District kübok lir anungji pa aputsü makok ta iba ken o atema Investigating Officer-i ashi.

September 9 nü Lamphel Police Station nung Officer-in-Charge dang teinyaktsü inyaktsü aser ki mita aotsü osang sangoktsü aser iba sülen nenshiaka tang tashi telangzüba kecha mali, ta Investigating Officer-isa ashi.

Pramot Singh dang October 2, 2023 nü Churachandpur Police Station nung investigating

officer tsüingdangi arutsü sangdong ka agütsü saka meinyak mesüra telangzüba kecha magütsü. Iba jagi okadaki pa anema non-bailable arrest warrant agütsüogio.

July 8 nü Kuki Students Organisation-i Pramot Singh anema First Information Report (FIR) ka benoka liasü.

Pramot aser Meitei Leepun ajanga online nung züluba aser taküm June 6 nü The Wire nung Karan Thapar den sensaksem dang olen kar jembiba anema KSO-i Manipur Police tsüingdang FIR benok.

Karan Thapar den sensaksem dang Pramot Singh-i Kuki nunger ajak Manipur nungi samatsütsü ta ashi.

Tetsütem asoshi National Integration Tour tenzükogo



CO 38 AR, Phek Col. Prasant Singh Chundawat ajanga October 15, 2023 nü Phek jila nungi tetsürtem National Integration Tour ka tenzüksüba mapang tangokba noksa nung angur.

Dimapur, Mongputeni/Oct. 15 (TYO): HQ IGAR (North) tawabangba kübok Assam Rifles, Phek Battalion ajanga International Day of Rural Women nungtem nung Mothers and Widows Associations of Nagaland indang National Integration Tour October 15, 2023 nü Commandant of 38th Assam Rifles, Phek Col Prasant Singh Chundawat ajanga Phek jila nung tenzüksü. Iba tour ya Phek nungi Delhi tashi indang alitsü.

Assam Rifles, Phek Battalion sangdong ka ajanga ashiba agi, iba sentong ya Assam Rifles temi ayongzükba lir aser yangi Mothers and Widows Associations nungi tetsür 16-i shilem agir.

Widows Association and Mothers Association of Nagaland nungi tetsürtem North East region alema oa tongtipang tesemtem sema anir jajatsü aser linük indang sobaliba aser puti otsü tajung angazükdaksütsü nükjidong

nung iba sentong ya ayongzük.

Iba tour nung parnoki linük nungi tongtipang nisungtem ajurutsü aser India Gate, National War Memorial, Red Fort aser Taj Mahal ama tongtipang tesemtem semdangtsü.

Parnok New Delhi nung metro train nung senzütsü, airport aser shopping mall tem semdangtsü.

Iba sentong ya ajanga state nung aliba tetsür temi yimti tulu nung libaliru yimyatam angazüksü aser pei takum nung temelenshi arudaksütsü.

Manipur nung telungpuri bandh ayongzükba ajanga nüburtem tim atemer

Imphal, Mongputeni/Oct. 15 (Agencies): Manipur ya October 15, 1949 nung Indian Union nung aiddaksüba anema telungpur telok ti-i ghonda 12 nokdangtsü Deobarnü ayongzükba ajanga Manipur nung nüburtem tim atemer.

Iba anogo ya National Black Day ama amunger.

Imphal nung dokan aser businesses tem shibang aser yimtung azüing-azüing liasü, ta police temi ashi.

Ajisüaka tongtipang tesemtem nung sepaitem gari senzüa liasü.

"Tang tashinung timtem atalokba osang kecha mali,

kechiaser yimjung nung mokdanga liasü," ta police-i ashi.

Medical, media aser tamangba yimsü dak sendakba sentongtem densema emergency aser tongtipang sentongtem iba tenokdangba küboki mait.

Item telungpur teloki sangdong ka nung ashiba agi, Indian Union ajanga tashiyim amshia October 15, 1949 nü Manipur atsioka Manipur tashitemeden songtem.

Deobar anepdang 6:00 ako nungi tenzükba Manipur tesem ajungalen mokdangba ya Coordination Committee (CorCom), Socialist

Revolutionary Party (SOREPA) Kangleipak, aser Alliance for Socialist Unity, Kangleipak (ASUK) ajanga ayongzükba liasü.

CorCom ya nokdanga aliba telungpur telok trok lungjemer tentetba lir.

Item telok ya Kangleipak Communist Party (KCP), Kanglei Yawol Kanna Lup (KYKL),

People's Revolutionary Party of Kangleipak (PREPAK), its Progressive faction (PREPAK-Pro), Revolutionary People's Front (RPF, the political wing of the People's Liberation Army-PLA), aser United National Liberation Front (UNLF) alitsü.

CBCK ajanga Project 2026 Music Recital-I ayongzük



Project 2026 Music Recital-I nung shilem agirtem aser ketdangsurtem külemi tangokba noksa ka yangi angur.

Kohima, Mongputeni/Oct. 15 (TYO): Chakhesang Baptist Church Kohima (CBCK) indang Children Ministry & Music Ministry ajanga CBCK nung "Let It Shine" omen nung ajemdaker 2023 batch pur atema tanü Project 2026 Music Recital-I ayongzükba liasü.

CBCK indang Children Ministry ya 2026 küm Golden Jubilee amungtsü renemshiba mapang lir, anungji tanurtem kenten-menü nung asüingsashitsü angateta music school ka tenzüksü lemtet.

Iba nükjidong nung takok angutsü mechi ministry ajanga

arishi küm 11 aser 13 tsüingta tanur atema basic music course tenzüksü lemteta Project 2026 indang class mezüingbuba ya March 5, 2023 nü tenzük.

Tang aliba tila-tanurtem kentenba sempet tajungba kumdaksütsü aser Jubilee benjongmung nung shilem tajung agitettsü nükjidong nung Project 2026 ya tenzük, ta Jennifer Veyie-i ashi.

Project 2026 nung guitar, piano, drum aser voice indang class angati agütsür.

2023 batch indang first recital nungya vocal, drum, guitar, piano ensembles aser kijai

atena ken tena liasü.

Iba sentong tenzükba Nibano V. Swuro, Director, Music Ministry CBCK ajanga tarur pela agizükba o jembi aser CBCK senior pastor Rev. Dr. Kevekhalo Lasuh-i Tsüingrem temoatsü meshia sarasadem.

Baptist Theological College, Pfutsero nungi Guithuiba BK-i o tatsüka jembi liasü.

Maneni CBCK children ministry superintendent Khruhizo Dozo ajanga melepzüing o jembi aser Razukhru Vasa, deacon in-charge, Music Ministry ajanga sentong tembanga sarasadem.

Meghalaya: NPP state tir menden nungi WR Kharlukhi anener

Guwahati, Mongputeni/Oct. 15 (Agencies): WR Kharlukhi-i NPP Meghalaya tir menden nungi alutsü aser academic tsütsü rangloksü ta shiogo.

Pai ashiba agi pa party nung küm 16 tashi inyaka arur aser temelenshi nungdaker ama ajitet.

Lanur lenirtem nem maongka agütsüner, ta paisa ashi.

Assembly elections atongtsü lia pa mapa nungi anener ta osang prokshia aliba pai magizüker ta ashi.

National president ajanga ad hoc president temelapa nung



WR Kharlukhi

shimtsü mechi pa mapa nungi anentsü July ita tezüluba agüja liasü, ta pai ashi.

Pa MP ka ama maneni inyaksü aser pa kümsük 2026 nung atemtsü, ta pai ashi.

Tanü Rahul Gandhi-i Mizoram semdangtsü



Rahul Gandhi

aliba nisung ka tekolakba sür aliba Zoramthar group mesüra Lalpa Chhiahlawh Intelkhawm (Association of God's servants) ya menden 18 nung tokteptsü ta ashir.

Aam Aadmi Party-ia iba assembly elections nung tokteptsü aser taruba hopta candidate tenüing sangdongtsü akok, ta party secretary Joseph Biakthianghlima-i ashi.

Chief Minister Zoramthanga ya kümsük tanabuba atema par Aizawl East-I nungi tokteptsü.

Pa ya ZPM vice president aser ex-MLA Lalthansanga den tokteptsü.

Deputy Chief Minister Tawnluia ya Tuichang constituency nungi tokteptsü.

Tang teinyakdak MNF legislators 26 rongnungi Home Minister Lalchamlia metokteptsü lemtetogo.

Robert Romawia Royte, shiba tang MNF ministry nung tetemsü minister ka ama züingshir, pa taoba mapang Aizawl East-II constituency nungi toktepa liasü saka taküm Tripura arütsülen Mamit district kübok aliba Hachhek constituency nung Congress MLA Lalrindika Ralte den tokteptsü.

Aizawl West-II nung Rural Development Minister Lalruatkima-i ZPM nungi Lalnghinglova Hmar den tokteptsü.

Lalruatkima ya kümsük tasembuba asoshi tokteper alitsü aser Hmar yagi Mizoram football nung temelenshi bener arua lir.

Ajak dang Serchhip menden ya tesashiba alitsü amanger, kong tang teinyakdak ZPM MLA Lalduhoma, shiba party indang chief minister candidate lir, pai MNF debutant J. Malsawmzuala Vanchhawng den tokteptsü.

Anti-defection law kübok 2020 küm Lalduhoma ya disqualify sütsü saka April 2021 assembly by-poll nung takok angu.

Congress tir aser taoba finance minister Lalsawta ya par Aizawl West-III nungi tokteptsü telemtetba agiogo aser pai tang teinyakdak ZPM MLA VL Zaithanzama aser MNF nominee K. Sawmvela den tokteptsü.

Aizawl, Mongputeni/Oct. 15 (Agencies): Taoba Congress tir Rahul Gandhi-i pa indang Bharat Jodo Yatra nung shilem ka ama October 16, 2023 nü election agitsü aliba Mizoram state semdangtsü.

Pa iba state nung asemnü amungtsü aser iba mapang assembly election asoshi nübuyimtsü, ta Congress treasurer Lalmalsawma Nghaka-i ashi.

Congress leniri Chanmari aser Treasury Square tsüingta kilometre ana shi jajatsü aser iba mapang party worker temia shilem agitsü, ta pai ashi.

Pai iba mapang tongtipang nisungtem den jembitsü aser osangbener den senden ka mener October 18 nü aotsü.

Gandhi-i state semdangba mapang Congress-i assembly elections asoshi candidate tem tenüing sangdongtsü akok, ta Lalmalsawma-i ashi.

Züingsem 40 aliba Mizoram assembly election ya November 7 nü agitsü aser vote ya December 3 nü azüingtsü.

Ajisüaka political party, arogo aser NGOs temi Election Commission of India (ECI) dang vote azüingba anogo melenshitsu ajungshir, kechiaser iba anogo ya Deobar ajurur, aser Khristanpur asoshi Deobar ya temeshi anogo lir.

Congress ya tawa ang People's Conference Party aser Zoram Nationalist Party (ZNP) den secular alliance tentetaka assembly menden 40 prong nung par sasa tokteptsü, ta ashi.

Mizoram nung tang sorkar tenteta aliba Mizo National Front (MNF) aser opposition Zoram People's Movement (ZPM) party ajanga menden 40 prong nung tokteptsü aser BJP-a par kisüing menden ajak nung tokteptsü.

Taoba mapang pastor inyaka

My Handloom. My Pride
"Khadi for Nation, Khadi for Fashion"

Do visit us at the
STATE HANDLOOM EXPO (SHE)-HATHKARGHA MELA
IN COMMEMORATION WITH CELEBRATION OF
KHADI & HANDLOOM MAHOTSAV FOR THE MONTH
OF OCTOBER 2023

11:00 am - 6:00 pm
AT URBAN HAAT DIMAPUR, NAGALAND

ENTRY FREE

09th-22nd OCTOBER 2023

ALONG WITH OTHER SPECIAL ATTRACTIONS.....
TAMBOLA GAME
EVERY EVENING
DELICIOUS FOOD COURT
AVAILABLE EVERY EVENING
TIMING: 2 P.M. to 6 P.M.

ORGANISED BY:
Nagaland Handloom & Handicrafts
Development Corporation LTD.
Half Nagarjan, Dimapur, Nagaland

SPONSORED BY:
Office of the Development Commissioner
for Handlooms, Ministry of Textiles,
Govt. of India, New Delhi

AIMIM Tir, Owaisi-i PM Modi dang Gaza nunger pusemstsü mepishir

Hyderabad, October 15 (Agencies): Israel Ato kilonser, Benjamin Netanyahu ya "mojing", ta shia AIMIM Tir aser Hyderabad MP, Asaduddin Owaisi-i Ato kilonser Narendra Modi dang Gaza nunger pusemstsü mepishiyo.

Israel sepaitemi ali nungi Gaza amakstsü atema sepaitemi Gaza City nung alir meyrjang aika dang iba tesem toktsür aienshitsu tuyuba sülen Gaza strip nung alirtem aika timtemba mapang nung Owaisi-i Modi dang Gaza nung alir Palestine nunger pusemstsü mepishir.

Amongnü Hyderabad nung lokti senden ka nung jembidang Owaisi-i Palestine nunger pusema jemi aser Netanyahu ya taochi maket yimsüsü ka, ta aitsü.

"Asen linük nung Chief Minister kati, Palestine tetshirtem anema ken o benoktsü ta jembir, anungji Chief Minister-i pai jembiba amaji inyaksüla. Ni nüma tanga Palestine wako aser asen linük wako asemer. Ni Palestine pusemer," ta Owaisi-i ashi.

Paisa, Palestine ya Muslim nunger kija timtemba masü saka

meimchirtem timtemba lir, anungji parnok pusemstsü nüngdak, ta ashi.

October 7 anepdang Hamas kiralongrartemi rockets amshia Israel amakba sülen Ato kilonser Narendra Modi-i, "Kiralongrartemi Israel amakba osang angashia India aoksar. Tai maket takoksa angurtem aser parnok kibongtem atema onoki sarasademtsür. Tang ama tensa ka nung onoki Israel pusemer," ta sangdonga liasü.

Mongolbarnü Modi-i, India - i Israel sashia pusemer aser kiralongraba tapu ajak sashia aitsür, ta metetdakja liasü.

Ajisüaka Brihostibarnü osangbenertem den jembidang Ministry of External Affairs otongdar, Arindam Bagchi-ibo, "India-i mapang talangka nungi Palestine linük nüchiso atema pusemer aser iba atema ken o jembitsüla ta jembia arur. Palestine nunger ali alitsü temeden aser parnok nija sorkar temeden lia arrtsü lateter Israel den yimjung nung alitsü onoki pusemer. Tang tashi iba tangatetbaji kasa dang lir ta ni bilemer," ta metetdakja liasü.

Operation Ajay kübok India nunger 274 Israel nungi anir aruogo



October 15, 2023 nü Minister of State for Civil Aviation, General Vijay Kumar Singh (retd.)-i 'Operation Ajay' kübok Israel nungi anir aruba India nungertem New Delhi airport nung agizükba sülen tangokba noksa nung angur.

New Delhi, Mongputeni/October 15 (Agencies): Israel nungi India nunger sensotem anir arutsü atema sorkari tenzükba 'Operation Ajay' kübok Amongnü anepdang züngia tayimtsü pezübuba nung India nunger 274 Israel nungi apuso aser anepdang 9:00 ako nung Delhi tonga aruogo.

Ministry of External Affairs-i X ajanga, "#OperationAjay osang! Tayimtsü 4buba nung passengers 274 anir New Delhi tonga aruogo. Tayimtsü anendak Minister of State General VK Singh-i sensotem agizük," ta metetdaksü.

External Affairs Minister, S Jaishankar-i X ajanga, "Anogo ka kija nung "#OperationAjay kübok tayimtsü tanabuba nung passenger 274 mener Tel Aviv nungi apusor," ta metetdakja liasü. Israel nung aliba India

nunger 18,000 anir arutsü atema Ato kilonser, Narendra Modi-i 'Operation Ajay' tenzükja liasü, iba sülen Brihostibar nungi tenzükba India-i anir arutsüpurtem registration agi tenzükba liasü.

Israel aser Palestine nunger tsüngda rara tenzükba sülen tang tashi nung Israel nunger 1,300 dak tema tepsetogo aser Palestine nungera 1,000 dak tema tepsetogo.

Israel nung aliba Indian Embassy-i India nunger company tem yariba den külemi teyari nüngdakba India nunger atema helpline ka tenzükogo. Israel nung rara tamajungba akümba sülen MEA-i Israel nung control room ka tenzükba tensa asadanga den külemi osangtsüsang metetdakja teyari agütsür.

Amongnü züngia tayimtsü

tasembuba nung India nunger 197 Delhi tonga anir aruba sülen ghonda ishika dang lir tayimtsü pezübuba nung India nunger 274 anir aru.

India nungertem Delhi nung aliba airport tonga aruba mapang nung Union Minister, Kaushal Kishore-i parnok agizükba liasü.

Minister-i, "Ni Ato kilonser Modi aser Ministry of External Affairs dang pelar aser tenüngsang agütsür. Linük sensotem atema Ato kilonser Modi-i nendaka inyaker aser Israel nungi India nunger kümzüka anir arur. Linük tonga aruba sülen parnok pelar," ta metetdaksü.

Operation Ajay kübok mezüngbuba tayimtsü nung India nunger 212 anir aru aser tanabuba tayimtsü nung India nunger 235 anir aru liasü.

Karnataka nung aluyimertem sen cr. 30,000 takoksa nguogo: Siddaramaiah

Mysuru, Mongputeni/October 15 (Agencies): Amongnü Karnataka Chief Minister, Siddaramaiah-i, taküm zünglu junga maruba ajanga state nung aluyimertem sen crore 30,000 shi takoksa nguogo, ta metetdaksü.

Ali hectare lakh 42 nung tsünütsü takoksa angur aser state nung taluks 236 nungi 216 nungbo zünglu junga maru, ta pai metetdaksü.

Mysuru Dasara benjung

tenzüksüba sentong nung jembidang chief minister-i, "State nung ali hectare lakh 42 nung tsünübabo takoksa angur. Taküm aluyimertem sen crore 30,000 shi takoksa nguogo. National Disaster Response Fund (NDRF) telatetba apir onoki Centre sorkar dang sen crore 4,860 agüjang ta mepishiyo aser Centre nungi team kati zünglu junga maruba tesemtem semdangogo," ta metetdaksü.

Paisa, tamalen state sorkari

state nung zünglu junga maruba taluks 195 lir ta sangdonga liasü saka senden ka amenba sülen cabinet sub-committee-i maneni zünglu junga maruba taluks 21 sangdong, anungji zünglu junga maruba taluks ajak senteperbo 216 lir, ta metetdaksü.

Siddaramaiah-isa, state sorkari tzi tajemtsü aser shiruru atema chiyungtsü den tzi densema teyari balala atema aluyimertem nem subsidy agütsütsü, ta metetdaksü.

Congress-i MP, Telangana aser Chhattisgarh nung candidates sangdong

New Delhi, October 15 (Agencies): Amongnü Congress-i Madhya Pradesh, Chhattisgarh aser Telangana state tem nung assembly election atema mezüngbuba shilem nung candidates tenüng aika sangdongogo.

Congress-i Madhya Pradesh nung assembly menden 144 atema tenüng sangdong, Chhattisgarh nung menden 30 aser Telangana nung menden 55 atema candidates sangdong.

Chhattisgarh nung chief minister Bhupesh Baghel-i Patan assembly constituency nungi tokteptsü aser deputy chief minister T S Singh Deo-i Ambikapur menden nungi tokteptsü.

Minister Tamradhwaj Sahu-i Durg Rural assembly menden nungi aser Chhattisgarh assembly Speaker Charan Das Mahant-i Sakti assembly menden nungi tokteptsü.

Pradesh Congress Tir, Deepak Baij-i Chitrakot-ST assembly menden nungi tokteptsü aser minister Mohan

Markam-i Kondagaon-ST assembly menden nungi tokteptsü.

Madhya Pradesh nung taoba mapang chief minister aser tang PCC Tir, Kamal Nath-i Chhindwara assembly menden nungi tokteptsü, taoba mapang chief minister Digvijaya Singh'er jabaso Jaivardhan Singh-i Jaghogarh menden nungi tokteptsü aser taoba mapang minister, Vijay Laxmi Sadho-i Maheshwar-SC assembly menden nungi tokteptsü.

Telangana nung Pradesh Congress Tir, Anumala Revanth Reddy-i Kodangal assembly menden nungi tokteptsü, CLP lenir Bhatti Vikramarka Mallu-i Madhira-SC menden nungi tokteptsü aser Lok Sabha MP, Revanth Reddy-i Malkajgiri menden nungi tokteptsü.

Lok Sabha MP, N Uttam Kumar Reddy-i Huzurnagar assembly menden nungi tokteptsü aser party otongdar, Pawan Khera kinungtsü, Kota Neelima-i Sanathnagar menden nungi tokteptsü.



October 15, 2023 nü Maharashtra state kübok Chhatrapati Sambhajnagar district nung bus kati truck tuluka dak atsükba lendong nung yirur ka hospital nung amongba noksa nung angur. Iba lendong nung nisung 12 asü aser 23 yiruogo.



TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 16, 2023

Onoka medical college lirgo !

Nagaland state kümer küm 60 buba nung Nagaland nung medical college lapoktetogo. Iba College dang Nagaland Institute of Medical Science & Research (NIMSAR) ta ajar. Ibai Kohima nung lir. Tesemji kecha masü, kechiyong Nagaland tilaka nung ya nübortem atema kechi kong lapokdir lapokaka lenmang dang jungra senzüsübo tetsüngda talangka masü, tesemji dang tetemsü aser nübortemji tangatet aser teyarinü süra kecha masü, kechiyong tesembaji dang masü saka mapa shitak inyaka aotsü atema itemji kanga nungdaker. Aji oda, Nagaland Medical College ya kong lapok ta asüba dang nungibo koma aoer ta asübajiang tongtibangba asütsü. Joko, asenoka medical onük indang jembidang tangar tsüngdang angüma lur senzüa alibato tangbo angüma atur terabo nümadanga senzütettsü. Aji oda, tangar den sensaksem dang tangbo asenokia 'Onoka medical college lirgo' ta shitettsü. Atangji, tangar apibo asenok medical college ya tilaka dang asütsüa akok, saka khen nung nisung 100 züngtetsüsa lapokba medical college-ji asenok atema tuluka amai asütsü. Iba college nung taküm nungi lanur 100 adenshia azüngertem rongnung asenok Naga nungertem dang masü tanga state-tem nungi arur tangar kaketshirtema lir. Tetezü, joko tangar bendangertema Nagaland-i medical azüngi arur. Ibaji jangratema aser nümadanga bilemer. Ajisüaka, ibai tetenzüker dang , anungji taruba küm pungo ya Nagaland medical college asoshi kanga tongtibang asütsü. Tang tashi nungbo, tesasatsüka, Nagaland nung tenzükba sentongtem kata junga takok ngua aoba mangur. Sentong kar junga metenzükter, kar tom nung anen aser kar akümlirtemia ogo ta saka asürtemibo marua ta asüba tia jenjang nung lir. Aji oda, Medical college atema shirangertem yaridak mozü ki tajung tulu nungdaktsü. Idakji tashidak tendangba aser shiranger anepaluba aser anepalurtem teperi ali nung dang medical college ya medical college mesüka tenzüka otettsü. Tangbo medical college meyong hospital balaka mali, anungji Kohima nung aliba Naga (Civil) Hospital ji Medical college hospital amai amshia atatsü sentong nung lir. Iba amaji medical college meyong mozü ki balaka meyanglu aser metenzük tashi anasa aliba district hospital-tem Dimapur, Wokha, Mokochung aser Zunheboto nung alibatemi department balala atema amshia ata nunga tajangzük aisü nung ngula ta bilemer. Medical college nunbo nisung tasü mang dena sensaa amshitsü, aji atema tasü mang tenlartema nungdaktsü aser mozü kidang takdang tesadem balaka nungdaktsü. Item ajakji, ashiko, medical college meyong mozü ki balaka maka tashibo dictrict hospital ka nungbo peria meinyaktettsüa akok. Item nungdaktem denji ajaki züngnüba medical college ka kümdaktsüsübaji tesayurtem dak tuluka keta lir, anungji tesayur tajungtemi litettsüsa parnok nungdak shitak agütsütettsüla. Atangji, medical college ya tazüngba degree angutsüba tesem dang masü saka taneptsü angudak tesem tongtibang akümer, kechiyong medical college lapokbaji mozü ki tuluka lapokba den kasa lir. Aji oda, taneptsü tajung angudak medical college nungbo tazüngi arurtem dang masü saka taneptsü bushia arurtema agizüker magizükma arutsü. Itemji 'medical tourists' akümer, anungji shirangertem aser parnok meina arurtemji asen lima nung amongdang mozü kijai masü saka tzü mopong tajung den alima topur ajungba ngur tashidaka aneptsüsa aser pelashishia amongtsüsa asenoki asen lima ya topur junga yanglutettsüla. Iba kisüng jagi asenok taneptsü dang masü saka nisung aika mapa angutsü aser kibong aika senotsü tajangzük ngua jangratema alitsü.

OLEMSABANG

KIYIMBA KULIZÜNG:

Tenlaki Nungi Mainshitsüla Vs Tenlaki Nungi Ainshitsüla

~ Imli P Lemtur, Jorhat

(Yashi adok nungi...)

- * "Asen Baptist doctrine den maputepba arogo ajak ya mamanger telok nung atener asü, Khristan sür nung balaka?...Khrista dak amanger sür nung, Laishiba kesa dang sür nung, ka (one) küma magizüktersüba-ya kechi Christian aka? ta bilemer anü"
- * "Denomination ajak nung doctrine aser tradition anaprongla lir aser ajakji inyaksangshi nung tongtipang aser temeshi amai bilemba ka lemsateper."
- * "Temshi kiyimba Arogo ajanga akümer ajak Tenla kidang agitsü, ta Ao Arogo ajaki mulungtepa ABAM Central council telemtetba lir..."
- * Tesem ka nung "...Pastorbaji aputsü bushir, anungji pa state balala nung jenoka lir. Pa alidak nungi, online ajanga, Sentep service ajak agir. Ano kiyimba, service jia kidang dang agitsür. Church deacon kari witness asütsü aser Pastorbai online ajanga sati kuli agütsür...Zoom service ajanga tang tashi yamaji mapa ajak function asur. Aika Yisu agizuka baptitsü..."
- * "Temeshi kiyimbaji Tenla kidang tang agitsüla, aser aji Laishiba tesayuba", ta asüba jia koba Lai tekong nung shia aliarna? Tsüngremji Tenla kidangji dang ashi, tanga tesem jagibo marur ana? Mesüra Pastorbai/Reverendba-ji Tenla kidang tang temeshi ashi, tanga tesem nungbo memeshi akümera na...?
- * "Kechi tesem nung satitsütsü ta masü saka satitsüpurji kotaki otettsü asü motettsü ta bilema, mesatitsüdang counseling junga agütsür satitsü nunga koda? ta nibo bilemer."
- * "Laishiba Tesayuba" ta masü, "Mungdang Telemtetba" ta amshidi arungma. "Laishiba nung amendaker" ta asüba olongji bener, Arogo inyakyim aika pei sobaliba aser pei atongba nung ajemdaker inyaker, ta tali jangjashitsür."

Item tasüngdangbatem aser shisaren ajak ya, tanü dendak Arogotem inyakyim asoshi kanga tongtibangtem lir. Ajaki aroka shisadangtsü onük ka. Anungji, iba dak ajemdaker, Kiyimba yimyarenya koda tenzük aser Laishibai-a kechi ashir? Iba indang tatsü agi lemsateper.

- * **Khristan Kiyimba Yimyaren Tenzükba: (Marriage Ceremonial/ Rituals)**

Tanü asenok Khristan tamangertemi amshiba kiyimba yimyaren ya, putu aika sua melenshia aruba yimyaren ka lir. Aser iba yimyarentem ya tamangba yimsü aser tanga sobaliba ajanga poktetdaktsüba aika angutsü. Khristan Kiyimba Yimyaren ya metetsü asoshi, mezüng/akhi tamangertem aser parnok sobaliba-tem melenshia aruba tatsü agi tatongti lemsar.

- * **Akhi Tamangertemi Benshiba:**

Akhi tamangertemi, kiyimba ya tamangba maparen ka ama mezüngshi, saka sorkar mapa (state matter) ama inyaka aru, aser tanü asenoki tenla kidang kiyimba kulizüng agiba yimyaren yabo maliasü. Anungji, mezüng tamangertemi, kiyimba ya, par sobaliba aser tsüngkong nung koma amshia liasü, yamaji dang benshia liasü.

- * **Roman Ozüng Kübok:**

Roman yimsüsüba mapang nung, tsükong aika nung tamangertem prokshia liasü, aser item tsükong ajunga nung, kiyimba yimyaren, tatishitsü agi, tetsür asüngdangba, zük meshiba (dowries), kiyir benjong amala ajakji, Roman ozüngi melaba ama benshia aru.

- * **Kiyimba Khristan Yimya Kümdaktsüba:**

Melungi, Khristantemi kiyimbaji, Khristan temeshiba mapa ka kümdaktsüsü tenzük. Mongin Laishir, Augustine of Hippo, parnoki anir Khristan Kiyimba ya meshiteta ayutsü asoshi sayua tenzük.

- * **Khristan Yimyaren (Rituals):**

Jokorla Middle Ages mapang nungibo, Khristan Kiyimba yimyaren nung, Khristan yimyarentem bendenloktsü tenzük. Tatishitsü agi, kulizüng agiba, temoatsü meshia sarasademba amala tenzük. Aser item yimyarentemji Putiri (Priest) anitsü tenzük.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Maneni sarasademtsüla aser teshisadang alitsüla: Rev. Zotuo Kiewhuo



Kohima, Mongputeni/ October 15 (TYO): Amongnü Koinonia Baptist Church nung pastor aser Kohima Bible College nung principal, Rev. Zotuo Kiewhuo-i tamangertem dang sarasadema dang aliba taküm kaka asütsü ayongzük, ta Koinonia Baptist Church Media Ministry-i sangdong ka ajanga metetdaksü.

Kohima Baptist Pastors Fellowship (KBPF) kübok Sumi Aphuyemi Baptist Church Kohima (SABCK) nung menden melentepba sentong nung jembidang Rev. Kiewhuo Zotuo-i tamangertem dang 1 Peter 4:7 nung shia aliba ama, kechisarena tatem anasa aitdagi, anungji sarasadem

nung nendaktsüla aser teshisadang alitsüla, ta ayongzük. Rev. Kiewhuo-i, "Kodang nai sarasademdir ibaji ajanga kodak den sendakteper aser Tsüngremer taginüba ataloktsür. Kong sarasademer, yangji Tsüngrem teka lir," ta ashi.

Yisu Khristai sarasadem tatishitsü asenok dang sayuogo; Pa baptiba sülen Pai lumia liasü, aser ibaji ajanga lumia sarasademtsü atema tamangertem ajungshir, ta pai metetdaksü.

Paisa temelungjang ka aser tanela ka ser Arogo longjema alitsü (Tenyartem Mapa 4:32) ayongzük.

Arogo nung lenirtemi

sayutsüngiba den külemi Tanela Temeshi ajanga taneptsüba aser kümzükba mapa inyaktsüla; iba atemaji theological degrees nung memetaloktsüla saka sarasadema tenzüksü nüngdak, ta pai ayongzük.

Paisa züngsemtem dang, sarasademtsü atema kümsük atakteta mali, anungji taintemi Yakob aser Issac-i sarasadema ama temoatsü meshia sarasademtsüla, ta ayongzük.

Iba sentong ya Associate Pastor Youth, Aghail T Sheqi leniba nung agi; SABCK lanurtem aser Rokovinuo Semy-i ken aten aser Lanu Aier-i taküm kuli lemsatepa liasü.

ANOGO ABEN TSÜNGREM DEN

Temeyoktep Sarasadem

T.Ken 141: 1-10

Tsüngrem chir ka ama asenok akaba maongka tulutiba rong nung kaji sarasadem lir. Osangtajung Ken nung asenoki atener, "Aseni tesünep sentok; amajok nung timatem, kechiyong asen Tsüngrem dang sarasadema maben!"

T.Ken 141 nung Dawidi sarasadema tebur tajung noksa ka sayur. "Kibuba, ni Ne dang ajar, kü dangi kara arungma: kodang ni Ne dang jadiri, kü ola nung tenarong tenjangma. Teronem ama kü sarasadema, nikongdang tetepsetba tenla ama kü teka mekangba ne madangi atudakjangma." (t.1,2). Yihuda nunger putiri temeshi meta nung tenla sabangi orr teronem menemba totzü balaka agütsü aser iba mesükba tangari amshitsü memela. Tekülemdak sabang nungi mokozüji atudang, sarasademji Tsüngrem tsüngdangi atur ta amang. Dawid Tekülemdak mali asü; pa chuba ka liasü, putir masü. Pai iba ken züludang pa tongpang raradak ka lia zülu asütsü. Saka pai ashi, "Nikongdang tepsetba tenla ama kü teka mekangba ne madangi atudakjang. Kü sarasadem teronem ama Ne dangi atudakjang." Sabang nung teronemji kanga kümdanga meyoktep; ibaji junga renema liasü. Yamaji asenoki asen sarasadem nung tekülem, nangzükba, mepishiba, tenüng asangba aser Pa nem bendanga agütsüba atentsüla. Tanela Temeshi-i tanela sabangji jangrudaktsüdi. Temulungjang temokong agi sarasadem tesü. Dawidi maneni ashi, "O Kibuba, kü bang madak tanüker ka yujang; kü tebangmechi kishi nükangma. Nisungtem shirnoki tai inyaker, parnok tamajung mapa nung matentsü Nai kü mulungjang tamajunglen teshidaktsü" (t.3,4). Asenoki Kibuba dang sarasademer külen asen tebangmechi aser temulungjangji temenen memena ta asenoki jangjadi.

Nai temepishiba dang masü temeyoktep sarasademer ? Kodang ne mulungjang nungi nai sarasademdir, Tsüngrem tushiang aser Pa taochi asoshi Pa tenüng sangang. Ne sarasadem Tsüngrem mulungjang nung tepela agütsüba teronem süang.

Dimapur Govt College Evangelical Union küm 50 Jubilee mongogo

Dimapur, October 15 (TYO): Dimapur Government College Evangelical Union (DGCEU) küm 50 ajungba Golden Jubilee October 14, 2023 nü Dimapur Government College nung mongogo, ta sangdong ka ajanga metetdaksü.

Jubilee mong omenji "Your Faithfulness Continues Through All Generations" liasü aser iba omen nung o jembirji Dr. Neizo Puro, Asst Professor, Dept of Botany, NU liasü.

Praise & Worship Team, DGCEU leniba nung tekülem aser tetushi agia Jubilee sentong tenzük. DGCEU Advisor, Zuchobeni aser taoba mapang DGCEU Tir, (2019-20), Ayuh Konyak na leniba nung iba sentong agi aser DGCEU Advisor, Dr. Hannah Tia-i sarasadema iba sentong tenzük.

DGCEU Senior Advisor, Sedevino Jakhalu-i lokti pelaa agizükba o jembirji aser taoba mapang DGCEU committee nung züngsem, Sunday-i ken ka aten.

Kasa sentong nung David Koza, President UESI, Nagaland; Bino, Pioneer



October 14, 2023 nü Dimapur Government College Evangelical Union (DGCEU) küm 50 ajungba Golden Jubilee mong sentong nung tangokba noksa nung angur.

Advisor, DGCEU, Dr M.L.Ngullie, taoba mapang Senior Advisor DGCEU; Edward Mariizii, State Secretary, UESI Nagaland aser Achum Shitri, President

DGCEU (2018-19) nungeri tesüiba küm aika tsüngda DGCEU renloka aruba bilemteta jembia liasü.

DGCEU committee Tongti o jembir, Dr. Neizo Puro-i pa onük metenzük dang pai sarasadema Jubilee nungo kakat sayaja liasü.

DGCEU committee DGCSU Tir, Bonghok-i tepela anküp o jembirja sülen Staff Worker, West Zone, Dimapur, UESI Nagaland, Kalivi Zhimomi-i sentong tembanga sarasadema liasü.

Office of the Tongpok Semchir Imsongunger Kidong Telongjem

H.Q. Mkg-798601, Nagaland

TENÜNGSANG AGÜTSÜR



Er. Moasanen Imsong



Dr. Alemtola Imsong



Dr. Temjennungla Imsong

- 1. Er. Moasanen Imsong, Chuchuyimpang, S/o Mr. Limawati & Mrs. Temjenmongla, pai NPSC 2022 tatidang agiba nung jenjang 4th buba nung EAC post ngutetba.
2. Dr. Alemtola Imsong, Yaongyimsen, D/o Retd. SDEO RC. Tocy & Mr. Temjenmongla, lai NPSC CESE 2022 tatidang agiba nung Assistant Professor in Philosophy under Higher Education takok ngutetba.
3. Dr. Temjennungla Imsong, Yaongyimsen, D/o Lt. I.Panger Imsong & Mrs. Alikangla, lai Post Graduate Teacher (PGT) NPSC CESE 2022 tatidang & PhD (Department of Science & Humanist NIT) Nagaland kübok takok ngutetba.

Iba takok tulu ngutetba asoshi Tongpok Semchir Imsongunger Kidong Telongjemi konang nungsang tetushi agütsür aser Tsüngrem tenüng asanger. Maneni Tsüngremi nenok taküm anema moajang ta sarasademtsür.

Sd/- Wb. Nungsanginba Tir

Sd/- Wb. Imtinungsang Tongti Zülur

Afghanistan kübok Herat province nung menoknok tasembuba agi kongshi



Hopta ka tsüngta Afghanistan nung menoknok tasembuba agi kongshia liasü. MSF Afghanistan ajanga agütsüba noksa nung Afghanistan anüolen Herat province nung menoknok tesashi ka anakba nung yirur alirtem yariba angur. Regional hospital ka nung nisung 100 anepalua liasü, ta World Health Organisation ajanga ashi.

Kabul, Mongputeni/October 15 (Agencies):

Afghanistan kübok anüolen aliba Heart province tang agi tasembubaba 6.3 magnitude menoknok ka agi kongshiogo.

October 8 nü menoknok tesashi ka anoka nisung 2000 dak tema süba sülen Deobarnü menoknok anakba densema iba tesem hopta tsüngda tasembubaba anakshitsüogo.

United States Geological Survey-i ashiba agi, menoknok yagi Deobar anepdang 8 ako süiba sülen kongshia liasü. Menoknok indang epicenter ya Heart yimti nungi northwest len km 33 shi pilar liasü.

Menoknok anakba sülen ano minute 20 lir 5.5 magnitude aftershock ka agi iba tesem kongshia liasü, ta parnokisa metetdaksü.

Deobarnü menoknok anakba indang osang agütsüba tashi nung tejangja memeteti liasü saka Herat Regional Hospital head doctor Abdul Qadeem Mohammadi-i menoknok lendong nung nisung 93 yiru aser nisung ka asüba jangjaogo ta ashiba AFP news agency-i metetdaksü.

Anogo ti tejakdang 6.3 magnitude menoknok kati Heart nungi northwest len km 43 shi pilar tesem ka anakshitsü aser iba tesem nung ano mezüngbuba menoknok dang nungibo magnitude tajemba saka aftershocks tesashi aika ajangshia liasü.

Iba menoknok yagi teraksatsüba tulu bener arutsüogo aser Taliban ketdangsürtemi ashiba agi, menoknok ajanga yimyak yimtsüngtem nung ki aika raksatsüogo aser iba den nisunga 2,035 tepseta liasü.

Kasa tesem ya anogo ishika lir ano menoknok ka agi kongshi aser iba mapang nisung ka taküm sama liasü. Iba tatalokba sülen nüburtem aika aftershock arutsü tsübutepa kima dang mejanga arudar.

Osang ajanga ashiba agi Deobarnü menoknok anakba

mapang nüburtem aika kima dang mejanga liasü, kechiyong parnok kitem chirepa parnok idakji sabangatoktsü tsübuteper.

Menoknok anakba sülen ano awi yirpu agi iba tesem kongshiba ajanga tensa tamajungba kümdaksü aser kima süki süzüker lila alirtem indang süki raksaja liasü.

"Heart nung alirtem mesüngjemteti kümogo aser parnok kanga tsübuteper," ta arishi küm 27 tain dokan kibur Hamid Nizami-i ashiba AFP-isa metetdaksü. "Nüburtem saka lia lendong atalokba ya Allah temaotsü lir," ta pai ashi.

"Nüburtem aika talidak ki maka aser aonung temekongba küma odar," ta Hamid Nizami-i shisem.

Taoba hopta kibong ajanga samatsüba menoknok anakba sülen nisung meyirejang aika ki chireper aliba temeket nung lia aliba mapang World Health Organization (WHO)-i ashiba agi, menoknok atonga anakba sülen nisung 20,000 shi iba ajanga kongshiogo aser lendong nung tetsür aser tanurtem timba taküm samaogo.

2021 küm August ita US sepaitemi Afghanistan toktsür aoba sülen Taliban shirnoki sorkar kümteta liasü, parnoki teyari magütsüteti arudar.

Menoknok lendong matalok tsüngda Afghanistan nung timtem tulu adoka nüburtem kanga kangshitepa liasü aser iba den international aid organizations den Taliban sorkar tesendaktep junga maliba ajanga nüngdaka aliba nüburtem nem teyari agütsütsü atema kanga timtema arudar.

Lokti tentet aser linük balalai teyari magütsüba sülen volunteer temi taoba hopta menoknok anakba sülen taküm alirtem aser tasümgangtem parnok teka tesa agi dang tutettsüsa aküm.

Linük kati danga Taliban sorkar ya officially agizüka mali aser linük aikati teyari agüja aliba nungi atsüginginba sülen Afghanistan nung humanitarian crisis tali tamajungba kümogo.

Israel army temi Gaza amaktsü renema lir, civilian tem ajener



Israel Defence Force Artillery soldier temi Gaza tsütsü injang khaloktsüdang tenarong tanger aliba noksa nung angur.

Gaza Strip, Mongputeni/Oct. 15 (Agencies): Palestinian Islamist telungpur telok, Hamas ajanga amakba sülen Deobarnü Israel sepaitemi iba telok samatsütsü nükjidong nung alilen nungia Gaza amaktsü renema lir.

Hamas telungpuri ajungbena Israel maka nisung 1,300 dak tema tepseter anogo ti jungogo aser Israel-i telangzüba tesashi agüja Gaza nung bomb züngermezüngmai pokloktsüba mapang nisung takum 2,300 dak tema agiogo.

Kilometre 40 talang alinük nung rongrongshirong aser tetsübo agi sünga lir, kong mapang ka aliba nung nisung timtiba aliba tesem ka liasü, saka tangbo Palestine nunger pei kidang nungi jena aortem atsükokdak tesem maka kümogo.

Gaza yimti ajunga raksaogo aser mozüki nung yirur alir agi masemer, saka ano iba dang nungi tamajungba tia arutsü tetsübo nung lir.

Israel army temi ali, anüng aser tzüyim nungi amaktsü ta ashiba sülen küm aika mokdang nisung million 2.4 aliba tesem meketa Israel sepaitem adenshir.

Israel north tsütsü UN-i antikba Lebanon den arütsülena sepai aser tanks tem tonga aruogo aser kilometre pezü 'wide zone' ka shibangogo, kong

Hezbollah aser danga telungpur telok tem den khatepa liasü.

Honibarnü Israel Ato Kilonser Benjamin Netanyahu-i south tsütsü Gaza anasa yakbang nung aliba sepaitem semdanga liasü. "Nenok renema lir südi? Tali arur," ta pai ashi.

Ground operation atema mitkar tem renema lir saka yimten-yimsüsür temi mapang latetba atar, ta Israel mitkar indang odongtari nenshia shiogo.

Special forces tem Gaza telungi ai aser Hamas teloki nisung 150 jungnüa pua bener ao südi ta tsüboa aliba nungi tasümgang kar bener aru. Nisung 120 dak tema pua aliba jangjatetogo, ta Israel-i ashi aser item rongnung nisung 22 Israel-i tayimtsü amshia amakdang süogo ta Hamas-i ashir.

Gaza alilen nungia amaktsü amokmerenba ajanga tesüiba mapang Iraq kübok Mosul aser Fallujah samatsüba ama tia ka arutsü akok, saka Hamas teloki longpok aika tua aliba ajanga Israel sepaitem asoshi tali tepenja asütsü.

Israel-i Palestine nunger million 1.1 dang northern Gaza yutsür aotsü metetdaksü aser gari, truck aser gato nung khu oshia bener south tsütsü nüburtem aor.

"Jong ama amshitsü asoshi parnok jena aoba Hamas teloki nokdanga ayur, ta Israel-i aitsür.

Gaza nung 'humanitarian crisis' ajurutsü ta linük balalai ashir, kong Israel-i tzü, chiyongtsü aser power shibangtsüogo aser pua alirtem mechiok tashi tesem ajungalen sapanga ayutsü nangzüka lir.

Israel inyakyim ya par kumzüka ayutsü merangba dak alia aor aser Gaza nung aliba nüburtem merenshiba anentsüla, ta China indang Foreign Minister Wang Yi-i ashi.

South tsütsü Egypt-i Gaza alema senzüba arütsü aziüoka lir, saka teyari agütsüba gari tem yoktsü memela tashi bendanger anizüker aotsü atema arütsü lapoktsü memolunger.

Muslim linüktem nung ain adokteper aser Palestine nunger bhukumer temi Israel aser American flags aronger.

Israel tsükchir Iran den sendaktepa aliba telungpur teloktem Lebanon aser Syria nung aika lir, anungji Israel army asoshi tesem aisülen rara tenzüksüsa akumtsü.

Israel north tsütsü Lebanon den arütsülena taoba hopta khatepa liasü, kong Iran-i yariba Hezbollah movement temi telungpur telok tila kar arütsü alema yoktsü meranga liasü.

Israel anema mapa tamajung inyakba nungi nokdangtsü mechi United States-i aircraft carrier tanabuba region nung yoka lir, ta Secretary of Defense, Lloyd Austin-i ashi.

2036 Olympics host asütsü atema 2026 küm matongdang telemtetba magitettsü: IOC

Mongputeni/October 15, 2023 (Agencies): Koba yimti nung 2036 Summer Olympics ayongzüka asayatsü iba indang telemtetba küm asem tsüingda agitsü, ta International Olympic Committee-i Deobarnü metetdaksü.

India-i iba hopta 2036 küm Olympics ayongzüka asayatsü tejangraba aliba sangdongogo aser Ato Kilonser Narendra Modi-i IOC lenirtem den Mumbai nung sensaksemogo.

Linük nung Olympics khen danga ayongzüka asaya mali, saka 2010 küm Delhi nung Commonwealth Games ayongzüka asayaogo.

"2036 küm India nung Olympics ayongzüka asayatsü atema takokba tashi inyaktüsü. Iba ya India nung crore 140 indang tejangraba aser pungmang lir," ta Modi-i ashi. "Nenek den longjemmer onoki iba

pungmang ya asangsang kumdaksüner.. IOC-i India pusemstsü ta ni tamang akar."

Modi-isa, India nung 2029 küm Youth Olympics ayongzüka asayatsü ta ashi. "Saisapong ya medal anguba dang masü saka nüburttem mulung koktetba ka lir," ta pai ashi.

India den linük aikati iba asayamung ayongzüka asayaner. 2024 küm Summer Olympics Paris nung asayatsü aser 2028 küm Los Angeles nung asayatsü. Australia kübok Brisbane nung 2032 Olympics ayongzüka asayatsü. Poland, Mexico aser Indonesia nungeria iba asayamung ayongzüka asayatsü tejangraba aliba lemsatepogo.

"Telemtetba ya IOC lenir tasentemi agitsü aser 2026 mesüra 2027 matongdangbo magitettsü," ta IOC indang future host commission

mendenbula Kolinda Grabar-Kitarovic-i ashi.

"Iba asayamung ayongzüka asayatsü tejangraba aliba linük ya ter dak tema lir," ta lai ashi.

Lai, tejangrartem ya summer aser winter Games naprongla atema asü 2036 Summer Olympics kija atema iba indang osang tejangja magütsü.

India ya saisapong nung kanga tashi ita kumdar aser iba ita Asian Games nung pezübuba nung tembangogo. Taküm otsüsüsüsa India-i gold medal 28 densema medal 100 dak tema nguogo.

India-isa, Tokyo Olympics nung gold ka densema medal tenet ngua liasü.

India nung cricket asaya ya ajak dang nungtuguba lir, koba 2028 küm Olympics nung züngoksemtsü atema iba hopta shimogo.

Hubert Hurkacz-i Shanghai Masters kokogo



Mongputeni/October 14, 2023 (Agencies): Deobarnü Shanghai Masters tebur kija asaya final nung Hubert Hurkacz-i 6-3, 3-6, 7-6 (10/8) agi Andrey Rublev madak takok ngua iba asayamung kokogo.

Poland nung 16th-seeded asayar atema Shanghai Masters akokba ya pa indang career nung Masters tanabuba akokba liasü. Pai 2021 küm Miami Masters kokogo aser ajak senteper ATP title tenet bona lir.

Asaya nung asayar anapronglai match points anguba maongka magiteti asaya aser kanga toktepa asayaba sülenang Hubert-i asaya koka liasü.

Mezüngbuba set nung Hurkacz-i tetenzük nungi Rublev nongshia asaya aser serve ka break süa pa 4-2 agi tejakdang aküm.

Iba sülen Hurkacz-i pa indang serve break mesüdaksü asaya aser pa maneni 5-2 agi tejakdang liasü.

Iba asayamung nung Hurkacz-i aces 77 orr liasü aser Rublev-i pa indang service junga magizükteti liasü.

Mezüngbuba set ya Hurkacz-i ace ka aoba sülen minute 31 buba nung koka liasü.

Iba set makokba ya Rublev asoshi Shanghai mezüngbuba set makokba liasü.

Ajsüaka Rublev shibai April ita Monte Carlo Masters kokogo, pai tanabuba set nung Hurkacz indang mezüngbuba serve break süa pa 2-0 agi tejakdang ser tenzük.

Iba sülen Rublev-i arishi küm 26 tain Hurkacz nem maongka aika magütsü tanabuba set akok aser deciding asayatsüsa aküm.

Honibarnü Rublev-i, semi-final nung Grigor Dimitrov akokba asaya nung pa mit adoka asayaogo koba kanga majung liasü ta ashiba den mapang kar nungbo pai pasasa mazüokteter ta ashi.

Rublev den medemdangra Hurkacz-i temulungtetba tulu nung kanga süngjema asaya liasü.

Tasembuba set nung 4-5 ta aliba mapang Rublev-i serve asü aser championship point ka kümzüka liasü. Rublev-i kanga aggressive süa asayaba aser court tezülen noksa tangoker ka dak asaloktsüba atema asaya repringertemi pa nemja liasü.

Iba sülen asayar ana tie break asayatsüsa aküm koba Hurkacz-i koka liasü.

Ebenyo aser Almaz nati Delhi half marathon kokogo



Mongputeni/October 15, 2023 (Agencies): Deobarnü Kenya nung asayar Daniel Ebenyo-i Linük yimtiba Delhi nung Vedanta Delhi Half Marathon asaya kokogo. Pa tang mezüngbuba iba asayamung nung shilem agia liasü.

Kenya nung asayar yagi tawa kanga junga asaya arudar aser taküm pai shilem agiba asayamung ajak nung pa tanabuba jenjang dak tekübok nung khen danga tembanga mali, kong August ita Budapest World Championships nung 10,000m nung silver medal anguba densema lir.

Track tesadang ka tashi Ebenyo tanga asayartem den külemi asema liasü saka iba sülen pai lokti toktsür ao. Iba sülen shingia pa menepa masemtet aser arishi küm 28 tain asemteper yagi minute 59 aser second 38 nung alizüng tongteta liasü. Pa tanabuba jenjang nung alizüng tongtetsang Külem Kenya nung Charles Matata (1:00.05) dang nungi second 27 agi takaraba alizüng tongteta liasü.

Kasa asemtepa nung Ethiopia nung Addisu Gobena (1:00.51) tasembuba jenjang

nung tembanga liasü.

Tetsür asemtepa nung 10,000m race nung Rio Olympics champion Ethiopia tsür Almaz Ayana-i, 1:07.58 nung alizüng tongteta la tanabuba jenjang nung tembangla Uganda tsür Stella Chesang dang nungi minute tesadang ka agi takaraba liasü.

Ayana, shibai küm trok tejakdang iba asemtepa koka liasü, la mezüngbuba km 5 tashibo telok den külemi asem ajisüaka iba sülen lai telok toktsür asem tenzük. Km 15 ajungba sülen Ayana shibai 5,000m aser 10,000m nung World Championships titles bona lir, la tanabuba jenjang nung aliba asayar dang nungi second 23 agi tejakdang aküm. Tetsürtem asemtepa nung Kenya tsür Viola Chepngeno (1:09:09) tasembuba nung liasü.

Ayana, shibai Rio 2016 nung 5,000m asemtepa nung bronze medal ka ngua lir la temekok anaprongla surgery agiba ajanga küm pongu shi masayai aruogo. Iba den la tanur soa bentsüba ajanga asaya nung shilem magiteti liasü. Iba sülen la 2022 küm Amsterdam Marathon nung shilem agi aser takok ngua liasü.

Indian elite men's race nung

Abhishek Pal-i Hangzhou Asian Games 10,000m silver medallist Kartik Kumar ajateta takok nguogo. Alizüng atongtsü km 1 shi anunga lia Kartik tejakdang liasü saka Abhishek-i Kartik menepa second ka agi pa tejakdang ser asaya tembanga liasü. Pai alizüng 1:04.07 nung tonga liasü.

Kasa asaya nung Sawan Barwal-i 1:04.17 nung alizüng tongteta pa tasembuba jenjang nung liasü.

Maneni elite Indian women's race Kavita Yadav-i kokogo. Lai 1:17.42 nung alizüng tongteta Rima Patel (1:17.48) aser Poonam Dinkar Sonune (1:17.49) na tejakdang liasü.

Philippe Clement Rangers manager kümogo

Mongputeni/October 15, 2023 (Agencies): Rangers-i taoba Monaco aser Club Bruges head coach Philippe Clement parnok indang manager tasenba asütsü simogo. Pa den küm asemser tesadang atema tenanzüktepa yangluogo.

Arishi küm 49 tain taoba mapang Belgium nung defender yagi Michael Beale melenogo, shiba iba ita tetenzüklen mapa nungi anenja liasü.

Clement-i aniba Monaco team Ligue 1 nung trokbuba nung tembangba sülen pa June ita club-i mapa nungi anenja liasü.

Rangers mendenbuba John Bennett-i ashiba agi, Clement ya tongtibang criteria ajak nung candidate tangatem dang nungi tajungba liasü.

Paisa, chief executive James Bisgrove-i anir board züngsemtem aser taoba Rangers asayar aser manager Graeme Souness nungeri anogo 10 tsüingda tetemsü candidate aika

asadangba sülen Clement asayartem den ajurutepa Honibarnü Hibernian nung oa asayatsü aliba asaya atema renemtsü.

Scottish Premiership club yagi coach tem aika asadangba sülen Clement aser Yokohama F Marinos head coach Kevin Muscat na shima liasü.

Clement-i domestic league trophy season asem atonga akokba densema takok tajung ngur aliba indang Bennett-i tuteta ashi aser pa ya Rangers indang manager 19buba asütsü shimogo.

Kasa mapang nung Clement-i Rangers' website nung ashiba agi, Europe nung club rongnung kanga dang nungtugu club ka nung inyaktüsü maongka anguba atema pa kanga pellar.

Rangers-i ashiba agi, management team tasenbai Hombarnü mezüngbuba

asayartem den ajurutepa Honibarnü Hibernian nung oa asayatsü aliba asaya atema renemtsü.

Clement mezüngbuba Bruges nung coach mapa inyaka liasü, kong pa küm 10 asayaogo. Iba sülen pa Beveren aser Genk nunga inyaka liasü.

Clement-i 2021 küm January ita Niko Kovac melena Monaco coach aküm aser par team jenjang trok nung aliba nungi tasembuba tonga ani. Ajisüaka parnok Champions League group stage majangteti liasü. Maneni Europa League knockout stage nunga parnok Bayer Leverkusen-i tsükdakja liasü.

Clement asaya aliba mapang Beerschot, Genk aser Coventry City nungi asayaogo aser linük tenüng nungia 38 ben asayaogo.

BILEMDANGANG

"Temelenshiji ner kibong nungi tenzükdakjang."